

郭襄靖公遺集

郭襄靖公遺集卷之四

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

奏疏

巡撫廣西

議懷永善後事宜疏

題爲酌議善後事宜以保固地方事准兵部咨訣

臣題爲僮寇糾黨爲患官兵乘勝剿平通論功罪以昭勸懲事覆奉

欽依內開咨臣將脩城繕堡練兵足餉一應善後事宜務要悉心議處以爲久安長治之計即有遺孽亦要相機撲滅毋容滋蔓以貽後艱等因備咨前來案查本年正月內據懷遠各哨監統官報到攻克叛猺巢穴功次緣由臣竊計收功有期善後爲急即行右江守巡道并鎮守總兵官李錫酌議去後繼又移師順剿永寧永福洛容陽朔各巢僮賊

隨據各哨亦報討平臣復通行各道將一應善後事宜作速議處務爲久安長計續據按察使仍管分守桂林道左叅政事吳一介右江兵巡道副使沈子木永寧兵備道副使莊國禎并總兵官李錫各議報前來又經批行布按都三司覆加酌議呈報到臣除撫捕殘徒分給田畝屯兵據守招民復業諸事臣等督行各道叅等官一面分投經理外該臣會同提督兩廣軍務都察院右都御史兼兵部右侍郎殷正茂巡按廣西監察御史唐鍊議照

廣西地方萬山聯絡猺獞蟠據自古已然其最劇者曰懷遠曰古田曰府江曰八寨曰北三北五其他巢寨難以數計無地無民之患前人慮之久矣今古田府江懷遠以討而平八寨以撫而定北三北五亦就羈縻遠近村巢一時聞風斂戢臣等仰體

聖明好生之德督行所屬及宣示諸夷從茲而後一意招懷不復以芟夷爲事矣顧獷悍相雄剽殺爲業譬之豺狼蝮蝎咆哮噬其性則然撫者固未

必革心即已討而服者亦難保其終弗變也惟乘此創懲之後益加經理之圖使內治以脩外防以飭則戰守招徠其機在外隨宜而應所謂無必勝之威而有常勝之算者庶幾在此臣謹酌之時宜參之輿論條爲十事上瀆

天聽伏乞

聖明軫念邊陲

勅下該部再加詳議覆

請定奪行臣等遵奉施行地方幸甚臣等幸甚

計開

一移設縣治據右江兵備副使沈子木議呈懷遠
舊縣斜倚大山前插高嶺大榕江逼其右潯江
衝其背附郭無寸地可耕城中無勺水可飲黑
白二猿環巢四面由潯江而上數十里始有三
甲殘民會貳江而下百數十里乃有長安司鎮
滿目穿坎四顧荆榛所以屢遭破滅者固其處
置失宜抑亦形勢所使也况原築城垣工程未
半近日頽毀殆盡爲今之計急宜改圖隨勘得

內外三甲中有地名程村地勢平行居民環向
倚民以立方可圖存但今彼中青黃未接蒸鬱
侵人興作旣難而相度亦未便俟農隙之候委
官詣彼查勘地利民情審畫停妥即行興工建
築以圖久安及將田土稅糧併行清理如衣巾
生員姚廷臣等所呈給照由帖覆實黃冊務從
寬省以安民徭之心中間未盡事宜容臣等酌
量便宜施行其洛容縣治先該知縣邵廷臣
議遷移地名白龍巖估計用銀四千六百餘兩

臣等批行守巡該道查勘向未議行蓋緣縣治
屢經殘破城中居民不滿百人多與僮村結識
物力方詘措處寔難以百十殘民而費數千之
餉此該道之所以竟寢前議也合無容臣等督
行該道仍將舊城倍加補葺其倚山原無城垣
一帶亦要設法砌築以便防守俟錢糧稍足另
議遷移伏候

聖裁

一聯東民徭據右江兵備副使沈子木議稱懷遠

徭寇蕩平其漏刃殘徒撫處已定相應分方責
成聯東以杜後虞如東岸北岸應責之武生朱
應暘督內三甲之民承管河裏太平南寨一帶
外三甲之民承管四港東濠波浪塘堀一帶武
洛洞人承管猛圍七圍一帶北果韋覃二姓僮
人承管桐木火燒洛溪合水至三門洛果一帶
西岸應責之原任永康縣主簿李材與原招楚
甕寨土舍韋昌金督上徭籠承管郡鄧湧尾一
帶中徭籠承管稿黃大地一帶下徭籠承管坡

頭田寨一帶又板江河潺大田蘆等處俱與融縣各徭僮相聯應責之融縣所千戶羅大本督浪溪僮人承管邊田板壁一帶寶江僮人承管板江豬肉一帶融縣所百戶任邦祚督魚樓僮人承管河潺至蕉花一帶背江僮人承管大田蘆至下徭籠一帶互相鈐束務保無虞又委名色把總王鸞統領土浙募兵板江防守以壯其勢而固其心但賞罰不明非所以昭功罪而示懲勸內百戶任邦祚原係失事人員如果鈐束

有功僅可贖罪如再誤事當從重擬千戶羅大本世祿一方朱應暘原撫三甲皆有地方責任有功酌量獎賞有罪重加懲治惟名色把總王鸞才力頗堪兵民孚戴自去歲已效防遏之勞在今春復著俘馘之蹟已蒙敘報相應准與實授原任主簿李材大兵未進之先撫安上下猥寵亦効有勞已經暫給把總名色如督率有功亦應併議敘錄該道所議無非責成激勸以保安地方之意俱應准行其王鸞委果著勞合給

割付實授把總以便管事伏候

聖裁

一選立社師據懷遠縣衣巾生員姚廷臣賀德呈
稱本縣殘民止有內外三甲一縣公務咸賴之
全不識字言侏僂服左袵答歌配偶與徭俗同
今蒙恢復每甲乞立社師一人教子弟寫倣書
習揖遜知倫類有能頗諳文字者即加以衣巾
朔望行禮其社師俯准充附寄學三年准廩六
年准貢等因臣面審各生情詞甚懇看得懷遠

殘民淪於夷久矣坐視變亂而不知捄固迫於
勢之不得已亦陷溺其心不復知有親上死長
之義故也今大熟廓清版圖恢復即徭獍稍知
嚮風者尚當設法誘導以開自新之門况殘民
係吾赤子天日再覩悔悟方新其忍鄙夷之而
不有以教之耶合無如姚廷臣等所呈内外六
甲每甲准立社師一名於附近融縣擇其習儒
業有行止者充之殘民子弟八歲以上聽令訓
誨所攻者寫倣所讀者教民榜日記故事諸書

所習者洒掃應對揖拜坐立之節其有頗諳文字者聽縣官申報提學道給與衣巾如果文藝通曉提學道歲考之時酌量收錄幫補增廩使速見爲善之利其社師以子弟之進益驗其勤惰一年之內所教子弟稍有條理亦聽縣官申報提學道准與充附如訓迪有方文行兼稱者提學道仍加優錄量准充廩充貢以示激勸社師束脩聽右江兵備道於所收該縣稅量或融縣存留糧內從厚處給夫姚廷臣亦三甲一衣

中生員耳征徭之役先出爲官兵嚮導孰謂殘
民盡無良心哉如三甲中有堪充社師者一體
收錄轉移化導之機未必不在於此伏候

聖裁

一慎固兵防自昔經制之臣雖境內乂安未嘗忘
戰廢武況在多盜之區當征討之後可不審時
度力益嚴武備之防哉方懷遠未班師時議者
有欲照古田三鎮事例改萬石宜良丹陽三巡
檢司爲土司者有欲添設守備者其說似矣但

懷遠僻在一隅非古田肘腋府江咽喉者比設
官立鎮供費不貲恐非可繼之道且殘徭畏威
乞命已出真心似無事紛紛建設以滋煩擾今
擬兵備副使沈子木議留土浙募兵共六百二
十二員名委名色把總王鸞統領水陸列營於
肆維江口足以控扼襟喉俟秋冬之後以漸掣
散洛容柳城舊有哨守軍兵今添足東泉里廂
二堡原兵又將各僮編立排甲鈐束僮丁於地
名橋鄧都勒平徑等隘路立堡守把委原任守

備金策往來提調亦足防禦若古田原設有千戶所有常安富祿桐木三鎮土司有牛河都狼等堡有龍相等營近據永寧兵備副使莊國禎議留叅將王瑞隨帶標兵四百員名汰各營老弱之數足供其食其兵頗精勁可備衝擊惟嚴督三鎮土司目兵稍足原額則戰守皆有所資若永福臨桂陽朔各縣先年設堡數多自大征古田後多從減革緣之緩急無濟今據分守桂林道按察使吳一介議於永福添設海灣一堡

屯兵二百名古鉢一堡屯兵三百名毛崗一堡
屯兵三百名皆給之剿遺賊田且耕且守臨桂
添設傘山一堡屯兵二百名陽朔併大水田金
寶頂爲一堡屯土兵五百名而又於理定羊角
遇龍翠屏等堡皆量益守兵水陸之備亦云厚
矣惟省城例有東蘭南丹那地三州歲出土兵
三千名更番戍守自大征古田將三州移設三
鎮而別議思恩鎮安田州出兵輪戍省城緣未
奉

題行各府州視爲額外之役又例諒輪戍梧鎮不免有重併之時以故各府州屢告不堪遷延推避出兵旣不及數又每愆期省城坐是空虛尤爲非計且各兵輪戍省城三年一更梧鎮六年一替而思明龍英數處原未議調勞逸似未適均合無今後將鎮安府益以湖潤寨共一年思恩各土司一年田州一年外加江州并上映下雷二崗共一年每年出兵三千名以四年一次俱輪戍省城泗城州一年歸順都康二州共一

年向武奉議二州并上林縣共一年思明府思明州遷隆崗共一年龍英忠州共一年每年出兵四千名以五年一次俱輪戍梧鎮分派歸一不致重併偏累庶土兵樂於趨役省鎮之防俱固矣伏候

聖裁

一繕脩城堡王公設險城郭爲固况在邊地城堡尤所宜先者但廣西地方民窮財訕惟桂梧二郡城垣頗固其餘府州縣城池創始原皆低薄

日久益致傾頽而桂林之灌陽義寧陽朔永福平樂之永安脩仁荔浦柳州之洛容來賓遷江慶遠之河池天河尤卑隘摧圯之甚至有僅盈數堵虎狼乘夜越而傷人者臣等遵奉

明詔節行督令所屬時加脩砌查自二三年間脩過柳州南寧潯州慶遠太平各府并鬱林永安橫州藤縣陸川博白興業興安義寧永福灌陽遷江融縣賀縣脩仁荔浦恭城永淳各州縣城垣共二十三處其間如柳州府則取給於別府縣

庫銀慶遠府則取給於解司銀兩灌陽義寧則
取給於司府帑銀他所葺脩類多委曲措處以
致督責雖勤簡陋相踵工程方竣而告脩之文
又至矣必欲從新砌築公私匱竭竟爾因循至
於兵堡則尤有足慮者廣西民夷錯處設堡甚
多即桂林二府無慮二三百所餘可推矣每堡
置兵或十名或二十至五十率皆環以木柵
覆以茅草井汲樵爨俱無所資一聞有警輒棄
而去恣其焚蕩竝未聞與賊格鬪者蓋自昔然

矣該臣節行各道歸併營堡屯據要害爲之堅
其壁壘謹其烽堠通其樵汲庶幾可以制敵而
人情紛然以爲難行蓋召募之兵多係給之閒
田以耕爲守官司僅月給魚鹽而已今併之則
兵不得田以耕民不得兵以守官司苦於版築
工費不貲而募兵又仰給工食養兵之費益廣
往往遷延時日迄無成功堡之不固兵之不強
盜賊寢以無忌是豈所以語綢繆桑土之計哉
合無容臣等嚴督各道將所屬各城池營堡擇

其尤急者從長計畫大加脩葺其工費之需或取之府縣或不得已取之布政司務爲一勞永逸之圖則城堡無虞兵民胥賴矣伏候

聖裁

一責成守令昔人有言得一良令如勝兵千人得一良守如勝兵萬人豈責守令者以批擣之能哉良以拊循消彌之功賢於甲兵遠矣廣西之爲民患莫大於盜賊故守令之政莫善於弭寇安民使州邑長吏真有視民如子之心則凡所

以禦災捍患者何所不至顧人才難得而善處
夷情者尤難或務制伏而踈於綏輯或事姑息
而闇於幾微及釀成變亂惟以申文告急爲足
塞責不知州邑以報之守巡守巡以報之撫按
爲日凡幾比其徵發應援爲日凡幾何以遏寇
之衝而拯民之急臣請自今以始剿捕防守
責之將領等官而平時招徠防範則有司專責
也各州縣掌印官務在用意撫安設法化導如
臣原行規條將應撫徕獐每村巢立一獐老鈴

束細小給與圓牌懸帶出入州縣官仍不時自
齋供餽親歷村落以通其情毋容吏卒人等需
求酒食毋容哨捕員役索取常規毋容排年緝
事生端凌害凡有不平之事未達之情悉與處
理令安其生樂其業益堅向化之心間有不知
悛革尚蓄異心者以計擒治之而又稽覈軍兵
以杜虛冒脩葺城堡以固防禦則撫綏制馭之
意俱得之矣知府司一郡之事勢難遍及州邑
責在嚴督各屬著實奉行察其勤惰上下其考

以白之撫按而行勸懲焉如守令之官不以弭
寇安民爲已責翫愒廢弛致啓戎心者即有他
能亦爲失職容臣等據實陳論責成專則治理
庶有成效矣伏候

聖裁

一申飭兵巡近該科臣建白銓部覈題各處分巡
官必須時常巡歷州縣誠灼見時弊其有裨化
理非淺鮮也廣西各道分巡皆兼兵備或兼撫
夷或專設兵備蓋夷情干係甚重視他省分巡

責任尤有不同者顧地里綿邈兼以他政所妨
兵巡官得遍歷州邑者從來鮮矣兵防積蠹盜
賊潛滋未必不由於此以臣所覩見隆慶三年
夏靈川縣七都民獍石章惟等作亂敵殺官兵
剽掠村里義寧通縣民獍乘機俱叛環縣城數
日以執殺官吏爲名時分巡官缺分守叅政陳
道基謀曰切近會省可坐視乎先之馳文諭撫
隨即親詣該縣詰責官吏而更置之黜革凡五
十餘人又爲之平其徭役祛其奸蠹民獍因之

大定向非本官親歷處分則二邑之亂未有已也守巡官之繫地方安危豈非明驗哉臣請自今以始分巡兵備官務遵近

旨雖偏州僻邑必行遍歷凡官吏之廉汙城堡之脩敝卒伍之虛實猥獍之向背一切民隱夷情俱從經畫毋徒沿襲故常虛文塞責以上背

明詔下負生靈也分守官責任均重竝宜不時巡歷協心經理以共靖地方督察嚴則州邑益知所謹矣伏候

聖裁

一申明統轄隆慶四年古田初平改陞永寧州設
兵備叅將彈壓其地而兼制柳州府之融洛二
縣蓋以二縣夷情與永寧聯屬故以洛容之托
定洛斗等獍并隸常安鎮土司鈐束融縣之恩
管等獍并隸富祿鎮土司鈐束而永寧兵備叅
將得以兼制之其意誠善矣但右江原自有兵
備叅將二縣哨捕軍兵右江所調發也哨捕官
員右江所委用也官兵糧餉右江所支給也而

永寧兵備叅將一無所與故自設官之後在右江則以爲永寧兼制在永寧則以爲右江專轄至官兵名籍不通知於永寧道叅者馴致隔絕散漫視若贅疣乳臭之徒得司哨守重寄弛防玩寇釀成刼印之變揆其所由統轄不專之故也合無今後將融洛二縣仍舊屬之右江兵備叅將專轄一應城哨官兵加意整刷村巢猺獍設法撫安如有出沒爲患縣哨官仍飛報永寧兵備叅將與右江官兵約會併力協擊其有融

洛獐人潛越境界與永寧下陸里諸獐糾結嘯聚者則聽永寧兵備叅將徑行撲剿亦不得互相推諉致誤地方庶幾事權歸一官兵益知所遵守伏候

聖裁

一議行鷗剿廣西獐獐種類繁多與他省夷情大別臣嘗考之都御史韓雍克平大藤峽其功最偉雍去而餘孽復熾橫江禦人嘉靖七年新建伯王守仁討之九年侍郎林富討之惠猶未熄

御史諸演請于 朝十八年侍郎蔡經復討之
於是始定王守仁用永保歸兵討平八寨秦移
南丹衛官軍屯守其地旋復背叛驅出官軍左
右兩江無時不被鈔掠郡邑城庫鮮有完者以
是推之廣西夷情槩可覩矣議者謂威必常伸
而後撫可安守可固以此也但動衆勤師原非
得已而造謀首釁其端甚微從其微而制之爲
力易待其滋蔓而後圖之則難矣故深入致討
之師非集衆數萬不足以分方合擊而鵬剿之

法則量賊勢大小即千百勁卒亦可成功大征
動以數月爲期而鵬剿則不過一鼓之力較之
孰易孰難孰省孰費當自別之今遠近徭獍一
時懾伏誠宜示以恩信以安其心萬一有不逞
之孽如韋狼要者出其倡謀之始排年緝事必
有知其端倪者吾但靜以待之密以訪之集附
近兵堡多至千人少或五六百人乘夜擊之如
迅雷不及掩耳未有不得志者此則調集旣易
收拾亦不難其爲計誠便也合無自今以後嚴

行各兵備道及叅將守備官將各營堡軍兵勤
加訓練遇有殘孽爲患一面相機督集密行鵬
剿或俟其出沒而截殺之如獲功數多容臣等
查照提督都御史應禎題 准事例奏 請陞
賞則官兵兢勸而殘孽畏威不患不斂戢矣伏
候

聖裁

一計處錢糧廣西地方猺獞充斥田土荒蕪布政
司每歲所入糧稅僅充 宗祿及官吏師生俸

廩之供此外原無分毫額派軍餉及大征古田
始奉發 內帑并各省解還餉銀稍有羨積皆
專備古田兵食之需近該臣等 奏留事例賊
罰稅畝等銀征剿懷遠支用已盡再留三年數
亦無多又以專備懷遠善後之費其省城總兵
標下及戍守狼兵與各營堡官兵俱仰給於梧
鎮發到年例軍餉銀一萬六千七百四十三兩
湖廣協濟糧銀一萬五百兩近議脩復營堡則
兵費稍增於舊而湖省梧鎮又積欠未解數多

燃眉之急其何以濟之得梧鎮餉銀除隆慶六年萬曆元年完解外其以前年分共欠未發銀四萬九百九兩零湖廣布政司自隆慶二年起至萬曆元年止除蠲免外拖欠糧銀三萬七千六百四十六兩零二項銀兩在梧鎮則取之廣東南雄橋稅及精兵折糧等銀事由兩廣軍門原係一體在湖廣則派之衡永長寶等府地屬唇齒均有共濟之義但廣東先爲地方用兵所司或多移用湖廣州縣視爲協濟鄰省率緩催

徵見今廣西兵後地方官兵嗷嗷待哺其勢不
得不仰濟於此合無乞行湖廣巡撫衙門并兩
廣軍門查將前項年分未完銀兩督行司府盡
數解發廣西布政司收貯以充兵餉以後年分
務在及時完解庶兵食稍足而地方可賴以安
伏候

聖裁

乞休疏

奏爲身病母老曠廢職務懇

恩放回田里以重地方事臣本海濱下士遭際
明時起自郎曹洊歷今秩入仕籍廿有五年無一日
不糜

天祿自祖父下及三世無一人不被

天恩分當捐糜以圖報稱遑恤其私顧臣之情大有
不容自己者臣自守郡叅政及長藩臬俱在炎
瘴之區當寇攘之警比塵

簡拔益值時艱臣才誠疎臣心獨苦積成虛弱痰火
上炎頭目齒舌無不受病况臣幼年背父臣母卓

氏止生臣一人就養十有六年向未還籍今年當
八十日惟鄉閭之思臣勞則母心益勞臣病則母
身益病呻吟抑鬱饕飮無一怡顏臣屢欲陳情乞
歸少酬親願緣強夷未殄正臣子披髮纓冠之時
義何敢言頃者仰藉

皇威疆隅底定所以爲緝綏保固之計者亦既與共
事諸臣亟圖之矣今母之暮齡日逼臣之精力日
衰雖犬馬微軀非所敢惜而烏鳥私戀難以恣然
情事牽纏形神消耗兵機政務緣之廢閣甚多若

復強勉供職萬一夷情反側邊備戒嚴臣以孱憊之體豈復能驅馳督率以裨濟艱虞耶恐徒瘁其身無益於事則臣報

主之義事母之情俱失之矣臣是敢冒昧披瀝於君父之前伏乞

聖慈憐臣積苦察臣真情

勅下吏部將臣早賜放回調治別推英敏特達之才以充斯任庶臣少追曠瘼之罪兼全母子之生臣不勝感

恩待罪激切懇祈之至

報滿疏

奏爲給由事照得臣見年五十五歲係福建興化府莆田縣人由進士嘉靖三十年四月內除授戶部山西清吏司主事三十五年三月內陞本司署員外郎本年四月內陞本部廣東清吏司署郎中三十六年二月內陞廣西南寧府知府四十一年二月內陞四川按察司整飭威茂兵備副使四十八年三月內陞廣東布政司左叅政隆慶元年八

月內陞廣東按察司按察使二年七月內陞本省
布政司右布政使四年四月內陞本司左布政使
五年七月內給由閏十月二十日准吏部咨爲缺
官事談吏部等衙門會推本年八月二十八日奉
旨郭應聘陞都察院右副都御史巡撫廣西地方欽
此欽遵於本年十一月初六日交代管事隨准兵
部咨爲議殄積惡巨寇以靖地方以復縣治事本
年十月二十三日該部題覆征剿古田功次蒙
恩於今職上陞俸一級萬曆元年三月初五日爲仰

仗

天威蕩平府江積惡巨寇飛報全捷事兵部題覆征
剿府江功次蒙

恩陞俸一級萬曆二年四月十三日爲仰仗

天威討平倡惡叛猺恭報全捷事兵部題覆征剿懷
遠功次蒙

恩陞俸一級計自隆慶五年十一月初六日交代管
事起扣至萬曆二年十月初五日止連閏實歷俸
三十六箇月三年考滿例應給由緣臣係巡撫官

員地方責任未敢擅離如蒙乞

勅吏部查例上 請定奪臣無任感激隕越之至

恭謝 恩賞疏

奏爲恭謝

天恩事萬曆二年六月初三日准兵部咨該本部題
覆臣奏報洛容等處捷音緣由奉

聖旨這僮賊剿平地方底定明係諸臣之功郭應聘
先賞銀三十兩紵絲二表裏李錫二十兩一表裏
其中功罪着巡按御史從公覆勘具奏欽此欽遵

備咨前來隨於本年九月二十五日據承差常編
齎捧前項

欽賞銀兩表裏到臣臣當即望

闕祇領叩頭謝

恩外臣感激悚惶莫知所措竊惟洛永諸夷本以犬
羊遺孽稔兇千紀負固逋誅適牂牁全捷之時當
天人助順之會士有餘勇揮戈而勢若燎原役不淹
旬解甲而民已安堵

天威遐震嶺侵全銷是皆仰仗

聖武之布昭誠非人謀所能與者也臣封疆待罪涓
滴無裨幸寬

斧鉞之誅詎荷

寵褒之及 光騰文綺沐

三錫之駢蕃 彩耀兼金侈百朋之鄭重蓋

天地大德不棄渺遐而犬馬微衷彌深驚惕勉圖磨
礪敢虛浩蕩之

洪恩矢殫絲毫仰副安攘之至計臣無任感荷殞越
戰慄之至

薦舉將材疏

題爲乞及時選求將材以懲玩愒以勵人心事臣
先准兵部咨談兵科給事中劉鉉題前事本部覆
議候

命下備行總督鎮巡等官虛心延訪但有所知無拘
見任隱逸及被論聽勘革棄等項人員上自總兵
下至卒伍民庶惟求其才不拘其類要見某可爲
大將某可爲偏裨某可備先鋒及遠使外夷據實
開註每人或舉一二員名或三五員名具奏等因

續又准該部咨爲急缺各地方將材乞 賜催舉
以備推用事內開歷年各鎮所舉往往詳於將領
而衛所指揮千百戶等官多不之及以故叅遊以
上僅足挨取陞用而守備等官有缺莫可充選合
行各撫按咨訪將該鎮人才不拘官職大小廢閒
見任新舊武舉及行伍草野內有知謀出衆膂力
過人及武藝優長且能實心任事有志立功者博
訪廣采的確列名開定等第具奏等因俱題奉

欽依備咨到臣欽遵通行廣西布按二司并守巡兵

備各道多方查訪去後隨據布政司左布政使程
嗣功按察司按察使魏文煥守巡兵備各道按察
使仍管叅政事吳一介副使沈子木僉事夏道南
等各查報前來臣覆加叅訪除見任總叅都司等
官謀略素著征剿有功者已經節次敘薦與衛所
行伍人員才識雖堪更歷未久者俟有後效再錄
俱不敢槩舉臣謹於見任間棄及效勞地方者得
五人馬查得原任分守潯梧左叅將被論回衛馴
象衛指揮同知亦孔昭久歷兵間熟諳夷狀運謀

而操縱有要奉委而艱險不辭董懷遠之師首扼
板江之吭督洛容之哨躬摧洛斗之鋒蓋惟忍性
於旣困之餘是以奮功於復試之日原推廣東海
康把總今暫管蒼藤岑三縣地方以都指揮體統
行事署指揮僉事周勲騎射獨優於倫類恩信素
著於民夷府江分哨與有溫定之功三邑提兵益
殫防禦之略久淹下位未展壯猷以上二臣堪備
叅遊之選內亦孔昭征剿懷遠洛容二項功次共
計九百餘級俱經敘錄宜復原職以酬其勞周勲

先蒙推陞續奉保留仍應及時拔擢以盡其用者也南丹衛指揮僉事王堯臣年力精強膽氣雄壯巡哨上林石棋等堡保障之績居多督征府江懷遠諸獯俘馘之功尤著士心多附輿論共推桂林右衛指揮僉事拱時才力老成志向敦篤早著聲於場屋技藝素閑近效績於府江機宜益試絕無粉飾之行恒存敬慎之心廣西總兵官標下中軍掌號名色把總陝西靖虜衛舍人路秉忠生長西北膂力旣極其堅強報效東南技能尤稱乎獨擅

心懷忠義馭兵無尅剝之私志在功名遇敵多衝鋒之績以上諸臣王堯臣生長右江夷情最熟拱時武科中式向未錄用俱堪任守備之選路秉忠查係兵部咨送密雲總督軍門轉發總兵官李錫委管中軍屢立戰功堪備先鋒把總之選者也伏乞

勅下兵部再加查訪如果臣言不謬將各官附簿紀名隨時錄用庶器使有人而材官思奮矣

保留給由方面官員疏

題爲保留給由方面官員以安地方事據廣西按察司呈奉臣批據整飭右江兵備兼分巡道副使沈子木呈稱本職見年四十一歲浙江湖州府歸安縣人由進士除授直隸太平府當塗縣知縣歷陞工部虞衡司主事本部都水司署員外郎本司郎中陞江西建昌府知府隆慶五年二月初八日陞授今職本年十二月初二日到任扣至萬曆二年十一月初一日止連閏實歷俸三十六個月三年考滿相應給由等因又奉督按兩院批據該道

呈同前事俱批本司查報依奉該本司看得本官
宅心洞豁厲操清脩具經文緯武之才抱長馭遠
駕之略屬大征動衆獨慷慨臨戎始討亂於懷融
旣成戡定復移師於柳洛再定勛勩任事任勞而
風猷峻整不苛不縱而法紀嚴明摘伏發奸一道
風清弊絕單車行部三年吏畏民懷望實久孚忠
勤素著茲當報政例應給由但地方正賴保障莫
安而右江尤係兵防重寄呈乞照例保留等因到
臣卷查先准都察院咨准吏部咨爲酌議考課之

法以肅吏治事談本部題

准在外官員給由方面官照舊赴京有事地方照舊
保留等因備咨前來遵行在卷今據前因該臣會
同提督兩廣軍務都察院右都御史兼兵部右侍
郎殷正茂巡按廣西監察御史李采菲從公考得
廣西按察司整飭右江兵備兼分巡道副使沈子
木才猷績密心事光明處艱危之地而注措得宜
當勦勦之時而憂勤匪懈撫拾寨及北三北五諸
夷曲盡招徠之道剿懷遠及洛容柳城諸寇懋成

溫定之功迄今一路之廓清實藉三年之經略既
經任滿似應給由顧右江本多盜之區而懷洛又
用兵之後雖經理招懷已有成績而消彌彈壓猶
在得人兵巡重寄難以輕離相應保留伏乞

勅下該部再加查議合無行令副使沈子木照舊在
任管事將行過事蹟備造牌冊差人齎繳赴部查
覈庶保障有賴而地方獲安矣

請復宗祿疏

題爲久困邊宗叨授封爵懇乞遵照

身具正公遺集 卷四
祖宗恩典賜給全祿事據廣西布政使司呈奉臣批
據鎮輔奉國中尉任訂經持約唘等狀告前事告
稱粵省宗室先年舊規五歲請名十五歲授封食
祿以禮婚配妻氏日期造入

玉牒沿襲至今二百餘年訂等遵照奏

請已賜有名於嘉靖四十二三年內奏 請封爵不
期頒行宗藩條例部司繩以不合奏格遂將訂等
駁查累次以致衣食不堪饑寒日甚萬曆元年十
一月內 本王府遵依

明詔恩例備具奏 請部議將訂等止給祿米三分之一訂等伏思封爵乃

朝廷睦親之典常祿實宗室活命之源旣已辯明非擅婚之比頒授封爵則宜得食全祿今止以三分之一是百年之弊罪罰於今日羣生之命陷穽於無辜雖隻身亦不能飽况能娶妻生子而望食全祿乎幸遇

明良際會之時雍熙泰和之日凡軍民有困苦無依者悉俾之各得其所今各宗無旦夕之謀有倒懸

之急誠爲可憐伏乞照舊賜給全祿等情又蒙巡按廣西監察御史李采菲批據任訂等狀告同前事俱批行本司查報又奉撫按兩院批據任訂等狀催爲懇恩會題復祿制以延多命事奉批到司該本司掌印左布政使程嗣功右布政使高察會同按察司掌印按察使魏文煥都司掌印署都指揮僉事汪可大查得靖藩諸宗先年以道里遼遠之故沿襲簡便請名之後繼以請封至於婚娶不復再請止是造入

玉牒類報其時當事者憐其險阻每遇具請卽與題覆遂致視爲成規相沿之罪由來已久非出故犯况未封之時自隆慶元年至今已食三分之一今授封爵而祿不加益欲其帖服勢必不能再查此中祿價止於四錢本色價值亦略相當卽得食全祿仰事俯育猶稱不敷今止三分之一每歲鎮國中尉所得不過二十五兩八錢輔國中尉所得不過一十九兩四錢奉國中尉所得不過一十二兩九錢且查一百二十一員內鎮國止三員輔國止

十二員奉國則一百零六員若不爲之一處各宗
資生無策其不至於流離失所者幾希哀鳴之狀
誠非得已乞爲原情再請等因到臣卷查近准
禮部咨爲際遇

明詔懇乞

天恩請頒久積名封以蘇貧宗困苦以免失所事該
靖江長子任昌奏本部議覆備查各宗見在文結
與玉牒文冊無礙即與類題填發勘合查照原
議給祿米三分之一等因題奉

欽依備咨到臣已經通行遵守去後隨據任訂等紛
紛訴告批行查報前來該臣會同巡按廣西監察
御史李采菲議照

國家處宗藩之道誠不出情法貳者制之以法所
以杜其冒濫之端通之以情所以聯其睽隔之誼
今任訂等已蒙

聖明垂念頒授封爵給祿三分之一其於情法已滿
盡矣而諸宗猶爾哀籲至再至三臣等欽遵

成命本難輕議顧沿襲之弊始於百年而擅違之例

繩於一旦其罪固不能免於情誠有可原況其困苦窮蹙之狀臣等得於目擊尤有不容以坐視者用是不避斧鉞冒昧上請伏望

皇上軫念邊藩

勅下該部再加查議如果臣等所言不謬將任訂等所告祿糧曲賜酌處則諸宗幸甚地方幸甚

奉 詔督脩撫屬城池疏

題爲開 讀事臣隆慶六年九月內欽奉

詔書內一欵城池所以衛民沿邊沿海尤爲緊要屢

詔增飭有司漫不經意一遇寇至輒被攻毀兵部
便行於各總督提督總兵撫按等官各將所屬城
池逐一閱視分別堪守與不堪守其不堪守者應
動何項銀兩脩補原無城池者作何建置通限三
箇月以裏具奏定奪欽此欽遵通行廣西布政司
并守巡各道將所屬府州縣城池逐一閱視勘議
去後續准兵部咨爲稽查章奏隨事考成以脩實
政事內開前事議限萬曆二年十二月終完報備
咨前來臣又經嚴催隨據布政司呈陸續行據桂

林等府申報勘過城池緣由開稱桂林府并所屬
全州永寧義寧靈川興安陽朔永福灌陽二州六
縣與平樂府并所屬永安富賀脩仁恭城荔浦一
州五縣梧州府并所屬鬱林藤容岑溪懷集博白
北流陸川興業一州八縣南寧府并所屬橫州上
思新寧永淳武緣隆安三州三縣各城池內灌陽
縣續報傾頽見行估脩永寧新寧二州城池係新
建其餘俱各脩理堅固堪以防守潯州府并所屬
貴縣城池皆脩理堅固平南縣應脩城垣串樓估

計申允動支庫貯鋪租壕塘商稅銀兩見今脩理
柳州府并所屬象州融縣上林遷江一州三縣城
池俱補脩堅固柳城縣城崩壞不多已經督催脩
理賓州應脩城樓窩鋪共用工料銀三十四兩零
議於該州庫貯贓罰等銀內支用羅城縣應脩梁
眼窩鋪共用工料銀三十二兩九錢六分議於該
縣庫貯支剩贓銀牛判折簞等銀內支用來賓縣
應脩城樓窩鋪共用工料銀二百二十六兩八錢
議於原寄府庫及貯縣均徭等銀內支用武宣縣

應脩城樓城垣窩鋪共用工料銀六十四兩三錢
伍分議於該縣庫貯審軍等銀支用洛容縣應增
脩城垣城門城樓等項共用工料銀一百零二兩
八錢議於本府原脩城剩餘銀及該縣原寄府庫
支剩糧銀內支用俱已詳允動支委官買料督匠
脩理亦堪防守慶遠府并所屬河池州城池俱脩
理堅固天河思恩荔波三縣原各係土城見行估
計脩理太平府城池脩理堅固堪守所屬四流一
十五土各州縣皆稱兵民雜居地方安堵原無設

有城池只用栽種竹茨或築土牆圍護思恩軍民
府係改土爲流竝無屬縣城池堪以防守等因呈
報到臣先該臣查得廣西各府州縣惟桂梧二郡
城垣頗固其餘創始原皆低薄日久益致傾頽遵
奉

明詔節行所屬時加脩砌陸續據報脩過柳州南寧
潯州慶遠太平各府并鬱林永安橫州藤縣陸川
博白興業興安義寧永福灌陽遷江融縣賀縣脩
仁荔浦恭城永淳各州縣城垣共二十三處其間

未脩者臣復督行各司道從長計畫大加脩葺其
工費之需或取之府縣或不得已取之布政司務
爲一勞永逸已經條議會本具

題該兵部覆議題奉

欽依咨臣通行欽遵外今據前因臣照得設險守國
城郭爲固况廣西邊徼之區城垣尤爲急務除桂
林與全州永寧義寧靈川興安陽朔永福七州縣
平樂與永安富賀脩仁荔浦恭城陸州縣梧州與
鬱林藤容岑溪懷集博白北流陸川興業九州縣

南寧與橫州上思新寧永淳武緣隆安陸州縣潯
州與貴縣柳州與象州融縣上林遷江肆州縣慶
遠與河池州及太平思恩二府各城池俱已脩葺
頗爲堅固而灌陽平南賓州柳城羅城來賓武宣
洛容各州縣城垣間有續報傾頽俱經委官估計
見在動支官銀脩理天河思恩荔波三縣原皆土
城低薄應爲增葺無容再議其太平所屬一十九
州縣原無設有城池內茗盈萬承等一十五州縣
皆係土官衙門惟左州養利崇善永康四州縣又

係改土爲流各該兵民栽竹種茨或築土牆足爲
護衛旣經該司府勘議民俗相安無用建置所擬
該司呈報督脩過各屬城池緣由前來復該臣叅
酌無異相應具題

考察自陳疏

奏爲自陳不職乞

賜罷黜以昭察典事照得萬曆三年屬考察在京官
員之期臣備員三品京堂官例該自陳臣年五十
五歲原籍福建興化府莆田縣人由嘉靖二十九

年進士除授戶部山西司主事歷陞本司員外廣
東司郎中廣西南寧府知府四川按察司副使廣
東布政司左叅政廣西按察司按察使本省布政
司左右布政使隆慶五年八月內推陞今職萬曆
二年十月初五日三年考滿具

奏給由本年十一月十七日奉

旨復職臣竊惟撫臣司方隅之寄負荷惟艱而西粵
爲夷獠之區關係尤重自非明敏果毅之才不足
以勝經略撫綏之任臣資稟凡陋智識顛蒙尸素

多年涓埃未效猥以識途之足濫與驅馳詎知負
乘之材動虞顛躓漸摩無術至勤芟薙之謀兢業
徒存何裨安攘之計是曠職之罪莫甚於臣黜幽
之典宜莫先於臣者伏望

聖明將臣罷歸田里別選才賢以代斯任庶重鎮得
人邊防有賴而於考察大公之典益昭明於天下
矣

乞歸養疏

奏爲母老且病久處異鄉懇恩歸養以遂微情事

伏念臣本以草茅之賤久叨豢養之

恩入仕廿有陸年歷官已拾壹轉感激

知遇慶幸遭逢致身報

主固臣分所當然亦臣心所不容已者也敢愛惜狗
馬之生自棄於

清明隆盛之世哉顧情事迫切有不得不哀鳴

君父之前者臣幼失怙賴臣母卓氏孀居守志鞠育
教訓以有今日辛勤孤苦形影相依故臣自竊祿
以來母皆就養然閭井之思時時有之臣方爲郎

署猶得以使事往來里中自臣守郡迄今幾貳拾
年間關嶺海無由奉母還籍頃歲母年日高念歸
日切緣臣有師旅之

命義不敢言今母年捌拾又壹嵐瘴久侵衰頹愈甚
眩暈宿疾每壹發則傾仆移時臣年亦伍拾有陸
虛火上炎口舌肩臂種種受患臣因母而益憂母
念臣而益病若非懇容休致扶持而歸以就醫藥
臣母子俱危也况嶺服要區兵符重寄臣以積弱
之體又奪於將母之情政務墮廢吏民怠玩恐獠

夷之嚮背地方之安危因之失職之罪臣將何以
自贖哉頃見吏部左侍郎楊巍告休終養已荷
聖明垂允壹時遠近臣工無不仰頌我

皇上大孝至仁推孝養之心以逮及臣下如此如臣
母廿載異鄉首丘在念其視巍母安居鄉土者尤
有不同是以不避斧鉞瀝膽陳情伏望

聖慈察臣悃愚素非避事憐臣母病實出真情
勅下吏部查照左侍郎楊巍事例准

賜放歸侍養別選才望以代斯任則地方旣免誤事

之虞臣母子俱荷再生之賜仰祝

萬壽歌詠太平皆臣報

主之日也臣區區懇切下情無任祈籲恐惶之至

議忠州改屬南寧疏

題爲定議隸屬以杜釁端以安邊壤事據廣西按察司整飭左江兵備兼分巡帶管分守道僉事李一迪呈奉臣批據思明府申稱本府額轄忠州上下石西州遷隆等州峒忠州近因土舍黃賢相承襲妄稱直隸不服本府管轄申乞備查該州原無

奏奉明文行令照依舊制歸屬本府等因又奉批
據忠州土官男黃有瀚申稱本州原屬思明府該
府吞噬不休屢代讎殺於嘉靖十九年內奉討安
南有功蒙兩廣都御史蔡經批准本州改隸廣西
布政司錢糧徑自解納征兵徑自調發至今三十
餘年不料隆慶三年有父黃賢相爲事監故南寧
府又行牌諭本州已屬南寧錢糧俱解本府乞念
本州歸隸多年仍准原隸布政司緣由俱奉批仰
左江守巡道查報依奉備行南寧府查議續據該

府呈稱查得忠州原屬思明繼改隸廣西布政司
後因土官黃賢相多年叛亂錢糧不解征兵不出
專一劫奪啓釁地方隆慶三年擒獲監故該本府
議呈分巡道霍僉事轉詳定屬本府備行忠州遵
照外就據該州管事官男黃有瀚申解隆慶三年
四年分糧銀共一百六十八兩到府交納訖今又
告要直隸布政司緣黃賢相冒稱直隸得以抗衡
鄰境恣肆暴虐殺掠無忌是以議屬南寧便於控
制况忠州與新寧接壤旣居上流地方又廣足以

自固一許改屬則前日侵暴之轍將復蹈矣竊謂不當論其舊案之有無直以今事勢斷之其應屬南寧無疑備呈到道看得思明忠州各申隸屬事情互執一端迄無定議查得隆慶二年叛逆不法土官黃賢相擁兵啓釁謀奪四都殘害生靈皆緣直隸之故釀成尾大之虞諒前道計擒正法議屬南寧潛消不軌體統既嚴法制亦備今土官男黃有瀚不思殷鑒未遠遽欲故轍相尋妄告直隸以遂走壙之性陰圖橫肆實切杞人之憂合無呈乞

特爲題

請將忠州就近改屬南寧管轄以銷隱禍呈詳到臣
又經備行布政司會議通詳去後隨據該司呈稱
該本司左布政使程嗣功右布政使高察會同按
察司按察使魏文煥議得人情每樂於自適體統
莫貴於相維况土官之性尤難約束非得統轄以
維之其不至於放逸者幾希忠州先年隸於思明
後以地方相離稍遠遂生玩心朦朧求脫於嘉靖
之中年恣肆妄爲於隆慶之初襁以至殘害生靈

殺身靡悔若不及今改屬制馭前事可爲明鑒所
據該道之請委應准從等因前來該臣會同提督
兩廣軍務兼理糧餉兵部尚書兼都察院右副都
御史殷正茂巡按廣西監察御史李采菲議照土
夷之性本爲叵測控馭之術貴於預防忠州初屬
思明繼改直隸其讎爭侵攘非一日矣土酋黃賢
相益肆暴虐遂至占奪肆都縱掠鄰境皆由無所
統御之故耳及僉事霍與瑕計擒監故議屬南寧
而地方始定緣事雖議行未奉

題允以致思明猶有舊轄之申忠州復懷直隸之望
若非定議歸一恐覬覦未息釁孽漸萌左江地方
未必不因之多事矣既經各司道議報相同無非
曲制預防之意相應題

請伏乞

聖明軫念邊方

勅下該部再加查議合無將忠州就近改屬南寧府
該州兵糧徵輸等項悉由督理庶於制馭之中兼
得銷彌之意土酋知畏而地方無虞矣

條陳右江地方事宜疏

題爲酌議地方事宜以安殘庶以固邊防事據廣
西布政司呈奉臣等批據分守右江帶管兵巡道
右叅議陳應春呈議地方事宜欸開一移縣治以
蕃民庶一移守備以制土酋一復舊兵以便鵬剿
一易屬糧以便催徵各緣由俱奉批布按二司會
議通詳該本司左布政使程嗣功右布政使高察
按察司按察使魏文煥查議得右江一道先年縣
城之遷置失宜將佐之駐劄未便戍兵掣調未復

錢糧逋負日深守巡該道目擊其弊思欲更新議
皆有攄事在可行等因呈詳到臣該臣會同提督
兩廣軍務兼理糧餉兵部尚書兼都察院右副都
御史殷正茂巡按廣西監察御史李采非議照粵
西多盜之區而右江柳慶二府尤爲夷藪憑陵之
患蓋自昔然矣頃年以來剿撫兼施犬羊稍戢但
積弛之後事體尚多因循乘威之餘經畫所宜詳
備則因時酌宜補偏揅弊誠有不容以已者所攄
該道條議四事皆屬地方要務旣經各司會議僉

同相應題

請伏乞

聖明勅下該部再加詳議覆

請定奪行臣等遵奉施行地方幸甚

計開

一移縣治以蕃民庶據守巡右江道議稱洛容縣在唐宋時邑治建於高巖水次人民蕃庶科目不乏至成化二年邑治破陷人民逃散暫依米崗寨爲逃生計因陋就簡遂爲邑城百餘年間

屢被殘破論風土則後迫高山前臨深谷背陽向陰日月之所不照風氣之所不聚論形勢則右迫永寧左迫柳城皆僅數里許去府城二日之程距上羅豐軌良村五六十里四面賊巢反受挾制從來縣官寄寓府城居民逃散四方失今不遷日就淪廢隨行委該縣知縣李日森馬平縣知縣趙宜親帶父老併諳曉堪輿之人沿江相度地名靈塘後有大山莊重而游衍前有溪水縈迴而周匝左右兩傍各有小溪二道屈

曲玄流會於大溪遷邑於此三面皆水誠爲自然之險即今村落百十餘家頗皆饒裕形勝風氣莫此爲善訪之士夫叅之故老咸以爲宜合無俯順民情將縣治改移於靈塘計築土城四百餘丈建城樓包輒二座併縣官衙宇之費大約不過千金移今洛容守城兵之半改桂灘哨江兵之半約共兵一百五十名以防守初創之城改大汾弓兵十六名編爲皂隸八名可以充經臨差撥之役分馬平協濟夫價銀四十兩可

以足上下水夫之需兵夫俱有措處洛容之賦
不加增臨河既有縣治永福之江永有賴其今
縣治仍改作洛容堡留軍兵一百名以指揮領
之控制殘獍疏通陸路等因臣卷查洛容縣治
先該知縣邵廷臣建議遷移估計用銀四千六
百餘兩因工費不貲一時難處已該臣等會議
暫將該縣舊城補葺俟錢糧稍足另議遷移題
奉

欽依外今據該道所請建邑居民誠非得已既勘靈

塘民村地勢便利爲費亦且不多況查永福至
柳州府及象州水程俱計三四百里沿江一帶
並無縣分即今江道疏通往來官使人員獨累
永福答應疲敝已極今移洛容縣治於水次實
適中之地不惟洛容民夷便於控制而永福疲
困賴以少甦委於地方有裨應如所議及時遷
建以慰輿情工費銀兩合於布政司并柳州府
酌量處發共足一千兩俟農隙之時委官擇日
興工建築以圖久安該縣舊城仍改作洛容堡

量留官軍住守其新城兵夫等項俱容臣等督行該道查照處置伏候

聖裁

一移守備以制土酋據守巡右江道議稱慶遠府設在右江上游府衛並建縣治附廓廼又居守備於城中漫無事事似屬冗員及查河池所去府百餘里當河池恩恩天河之衝扼都亮永順紅嶺白土之吭居民千家固一重鎮也該所雖設有印哨官兼收金城江稅旣染指於利權遂

鉞口於部曲威令不行防禦何賴合無將守備
官移鎮於此庶事權專一本官得以展布號令
申明諸夷有所畏憚張河池之聲勢杜三州之
窺伺而恩恩天河亦將有所恃賴其駐劄衙門
即將本所脩理以示居重之威仍用印哨千戶
一員脩分司以居之以存原設之意等因臣等
看得守令責在拊綏守備期於鎮壓慶遠府城
既有守令足以保民又居守備於中其於鎮壓
之義委無所取該道議將守備移劄河池千戶

所以當州邑之衝扼土司之吭誠得居重馭輕之意應如所議行令守備官遵照駐劄不許仍居府城希圖安逸其改脩衙門事宜俱無妨碍容臣等督行談道酌處伏候

聖裁

一復舊兵以便鵬剿據守巡右江道議稱粵西弭盜莫善於鵬剿而鵬剿機宜尤莫熟於狼兵即今大征之後稍就安戢但夷性難保馴伏一或出沒爲患截捕鵬剿常苦無兵查得柳州府城

先年歲調那地州兵二千名九月上班四月放
回每兵月支行糧一錢七分歲該請梧鎮餉銀
二千餘兩專備防禦鵬剿之用今那地州兵與
東蘭南丹二州兵旣改永寧三鎮而梧餉又難
復請是柳州鵬剿之兵與餉兩失其舊但三鎮
之兵原議每州二千實數方免別處歲調今查
鎮兵不及千名相應責令每州再出五百共一
千五百名專戍柳州於九月初旬上班二月初
旬放回不過五月在戍計該行糧一千二百有

奇如有猺獞出沒聽本道及叅將相機督發以靖地方其應給行糧乞於布政司鹽利給發六百餘兩其餘於右江存留銀內督催支給等因臣等看得柳州四面猺獞易動難馴自那地戍兵掣守三鎮之後緩急調遣委無足恃思患預防則戍兵之復必不可已應如所議自萬曆三年起每年於東蘭南丹那地三州每州出兵五百名共一千五百名依期調發防守在各州不得推諉如有抗違查叅究治其合用糧餉查右

江所屬存留數多容臣等嚴行談道設法催徵
自可足用不必取諸鹽利如果不敷方行申請
酌處伏候

聖裁

一易屬糧以便催徵據守巡右江道議稱查得宣
化縣左江屬邑也歲派柳州府折糧銀一千五
百餘兩曾無錙銖解納向武奉議都康等州右
江屬州也歲派南寧府折糧銀亦一千五百餘
兩向皆逋負虛數及移文催徵往返千里竟屬

虛文全無呈報合無將宣化縣還之南寧向武等州還之柳州各徵所屬兩得其便等因臣等看得左江折糧輸諸右江右江折糧輸諸左江是誠謂舛毋怪逋負之日積也今以宣化還之南寧以向武等處歸之柳州轉移之間事體誠便但查南寧府所屬原額存留糧米贏餘尚多臣等方在查理議解布政司以充宗祿兵餉之需則前項宣化糧銀相應併解司帑方免侵逋之弊伏候

聖裁

議留荊州戍軍疏

題爲計處添兵減餉事宜以固江防事准兵部咨
該提督軍務兼撫治鄖陽等處地方都御史王世
貞題前事內稱荊州城守單弱要將兩衛之戍廣
西靖桂班軍求撤其半爲荊州之衛緣由該兵部
看得廣西一省山巖險阻半爲猺獞窟宅土司分
割地理綿亘編氓稀疎一切防守之計兵餉之需
仰給廣東湖廣二省爲多至於湖廣靖州郴桂臨

武等處亦係苗夷雜處本地兵力防禦不敷故先
年調發荆襄等衛官軍輪戍其地地方稍獲無虞
行旅僅能不驚蓋

國家疆圉爲重無分彼此且兩省地界毗連唇齒依
附當時措置良亦苦心今提督王世貞慮及荊州
重地欲將班軍量撤其半以爲捍衛於本境之計
得矣但前項戍守處所皆係要害重地一旦撤其
班軍誠恐各夷乘虛竊發不無可虞且廣西與靖
桂等處騷動則湖省內地亦難安枕以後復議征

調益滋多事干係軍務誠難遙斷相應通行勘處
合候

命下本部移咨湖廣廣西各巡撫衙門從長查議要
見荊州調戍廣西靖桂等官軍應否撤回一半襄
陽調戍臨武清浪班軍應否量減三分之一逐一
查議停妥務求事體穩便通限萬曆四年二月內
會本具奏前來以憑覆

請定奪等因題奉

欽依備咨前來已經案行廣西布按都三司欽遵查

照從長酌議去後今據布政司呈稱會同按都二司查得廣西地方自永樂十一年

奏調湖廣所屬衛分官軍五千員名前來備禦迄爲成規後復添撥官軍五千員名分作上下二班輪戍荊州三衛官軍以原數計之備禦桂林府興安縣者上下班該五百二十六員名備禦平樂府者上下班該六百五十三員名備禦省城者上下班該五百四十員名除守興安者已於嘉靖十八年將湖廣永州衛官軍一百六十八名分爲兩班前

來戍守興安替取本衛官軍盡數撤守

顯陵去訖今據見在食糧之數守省城者荊州正衛止有八十員名守平樂者荊州右衛止有一百一十二員名均係戍守緊要地方兵力單弱哨守不敷實難輕議等因呈詳到臣該臣會同巡撫湖廣地方兼贊理軍務都察院右副都御史陳瑞議照粵西地方實全楚藩籬桂林興安則切近衡永平樂府江則切近郴桂而靖州則又懷遠之門戶故粵安則楚安守粵即所以守楚也當時建議諸臣

裒多益寡所以爲兩省長計者至周悉矣近年以
來兵威稍伸猺獞斂戢楚粵邊壤賴以少寧然易
動難安犬羊常態分屯戍守不敢一日弛防方有
兵力不足之患敢復從而減之乎况荊州三衛上
下二班官軍原額約計一千七百有奇今興安之
戍已經盡撤其見守省城平樂二處正右兩衛總
計食糧僅得二百零二員名較之原額曾未及十
二若復議減撤堂堂荊州得此數十羸卒曾無足
爲重輕而廣西諸夷傳聞撤軍之議恐一煽百起

橫潰四出莫可禁禦于此時而更欲益兵募卒爲防禦計譬之見兔而犬無所顧亡羊而牢不可補遠邇騷動八桂囂然矣湖南衡永郴桂之間亦豈得晏然享有寧宇哉且內地遠戍非獨廣西西北諸邊往往有之楚中地大人衆十倍于粵唇齒相維輔車共濟蓋亦勢之必不容已事之必不可易者也旣經該司會議前來臣復加審酌委難輕撤伏望

聖明軫念邊陲重地

勅下兵部再加酌議上

請定奪地方幸甚

薦舉方面官員疏

題爲薦舉方面官員以勵臣工事臣奉

命巡撫廣西地方陞任交代所屬方面官員例應舉
劾但一時藩臬諸司皆乘時感

遇恪共職業臣不敢過於苛求其賢能最著者合行
舉薦訪得廣西布政司左布政使程嗣功襟抱光
明風猷朗練民情吏治之嫩惡燭照無遺軍儲

國計之盈虛衡懸不爽綜出納痛釐奸蠹議因革動
協機宜卓然表率之司允爲方岳之望右布政使
高察丰標岳立學問淵深總司東憲吏民共服其
廉明列郡清戎黎庶咸安於鎮靜心上經綸煥發
目中臧否灼然銓衡之望猶隆屏翰之聲丕播按
察使仍管分守桂林道左叅政事吳一介高明洞
達卓犖不羣理劇剴繁夙擅循良之選叅軍督旅
游收戡定之功殄渠寇則以撫行勦飭兵防則用
守于耕恩威覃播遐方經畧允堪重寄督理糧儲

右叅政朱奎本質直之性而出之以精明有果毅之風而行之以平恕議鹽筴則究極弊源旣通商而足餉清賦額則講求要領又濟

國而甦民叅政兼右江兵巡道副使沈子木沉潛有執纘密善謀監師懷洛將士受算而奏成撫處賓來獠夷聞風而嚮化籌兵計餉四載苦心禦寇安民一方蒙惠分守右江右叅議陳應春慷慨任事正直存心操縱協宜渠魁如常明甫黨徒傾心聽命威稜丕振判目如李威父子束手就誅脩攘旣

有良猷節愛尤多實惠按察司分巡桂林兼理撫
夷副使彭文質盤錯利器百節皆通冰蘖清操一
介不苟守省會而正身率屬事有章程綰兵戎而
飭備樹防餉無虛冒一路風清弊絕兩郡吏服民
懷提督學校副使高則益文學富若淵涵襟懷粹
如春盎守左江而勤民弭寇三郡之惠愛方深綜
學憲而正已作人一時之文風丕振表儀旣樹經
濟兼優整飭府江兵備副使徐作英標朗識曠度
冲懷待將士得鼓舞之宜馭犴夷有弛張之畧嚴

水陸之哨守氛祲全銷覈兵餉之收支侵漁盡掃
器宜大受口不言功整飭永寧兵備副使吳善清
操無染明作有功馭參鎮之狼貪詰奸禁暴土酋
怵不假之威撫陸里之蟻附薄稅輕徭遺黎蒙
生之惠猷爲大展於新造化導漸洽于窮荒清軍
兼理屯田驛傳副使顧章志和易與人端方律已
陳情歸養行誼夙重於鄉評畢志策勲風猷見推
於時輩清戎折獄竝馳明允之聲理傳稽乂共頌
公平之政整飭左江兵備兼分巡僉事李一迪守

已渾如璞藏蒞事優若刃解行保甲練軍兵防禦
嚴而盜賊屏跡平徭差簡獄訟拊循至而漢土歸
心以上諸臣皆廉勤公謹所當薦揚內程嗣功雖
聞報陞任但尚未離地方高則益雖新任未深原
在本省推補例應竝薦者也伏乞

勅下吏部再加查訪如果臣言不謬將程嗣功高察
等循資擢用則才賢奮勵而治效益臻矣

舉勅有司官員疏

題爲舉勅有司官員以肅吏治事臣奉

命巡撫廣西地方陞任交代所屬有司官員例應舉
勅訪得梧州府知府許嶽才華與節操兼優惇大
與精明竝著率僚表屬儼乎郡邑具瞻節用愛人
油然而閭閻共戴惠政久敷於柳郡風猷益播於蒼
梧不惟治行首稱允宜艱大重寄南寧府知府杜
思敷歷久注錯愈詳堅忍深操持益勵約已裕民
而窮簷懷惠植良鋤暴而豪猾畏威士類感其作
興地方藉以安輯猷爲旣懋資望尤深柳州府知
府王任重佐郡夙著聲華專符益弘風采青天白

日吏治甄別甚精熟路輕車夷情處分悉當融懷
轉餉多藉經猷柳洛屯耕尤裨善後思恩軍民府
知府侯國治老成練事勤恪馳聲嚴稽覈以督錢
糧政司鮮侵逋之弊酌規條以定經費貳里免獨
累之嗟戍兵如期應調威令素行叛目以計擒誅
謀猷兼著平樂府知府羅黃裳器重厚而不浮才
通明而能斷勵精以清案牘百廢具興正色以馭
吏胥羣姦悉屏名實孚于上下恩信浹於民夷慶
遠府同知蕭騰鳳練達之識決若懸河冰檠之操

不愧暗室查盤南太廉明屢播於輿評理餉融懷
經濟尤徵於武畧賢勞超卓學問優長梧州府同
知熊瑞文明內蘊果毅性成居官無家累之隨圖
書兀坐應朝却屬僚之餽行李蕭然所至有梗直
之風不失爲郡佐之選平樂府同知林焜章翼翼
小心循循雅度理儲清肅倉庾之蠹政潛銷攝篆
寬仁臨賀之疲民甦息一塵不染四載如初梧州
府推官杜業年資青壯才識精詳摧稅而額課倍
增官商稱便署篆而清聲四溢黎庶蒙休明能燭

乎覆盆操可希於酌水南寧府推官李韓年青而
處以鎮靜識敏而濟以謙冲署縣則糧例盡革路
有頌聲催稅則蠹弊一清課有贏額實心任事加
意恤民桂林府推官孫承南年資清雅器識通明
勵志守官一塵不染殫忠奉職諸委不辭斷獄平
允兩造無掩抑之情清賦公平一方有廉明之譽
慶遠府推官方瀚通才夙諳世務邃學一本家傳
案牘手裁精詳有如老吏衙門嚴肅清高迥絕時
流折獄灼見幽微查盤共稱公恕芳聲懋著大受

允堪潯州府推官趙宗鳳心思縝密志向高明斷
疑獄緣情麗法囹圄無冤署縣符剔冗蠲浮窮簷
興頌守官素恪佐郡稱賢全州知州石應魁醇篤
之資廉靜之守革坊里之供應念獨切於疲瘵究
庫吏之侵欺法不移於近小絕無繁華顏習雅有
節愛真心河池州知州劉正亨丰儀壯偉學識老
成念土庶之凋殘而噢咻畢至憤隣酋之侵軼而
捍禦多方政績報成邊隅永賴遷江縣知縣丘鏹
守嚴而正識練而通議事犁然中窾頓振頑敝之

風莅民藹然可親覃布慈祥之政惠和庶幾循吏
冲澹無愧古人平南縣知縣嚴文輔政先體要志
振頹綱催徵停調新舊而欺隱難容編審劑量重
輕而應辦不擾官常克勵邑治改觀以上諸臣皆
奉公恪職所當薦揚者也又訪得慶遠府知府翟
年齡近邁志意已灰任門吏託爲腹心攜妻舅
專通關節贖罰過重民騰虎噬之謠聽斷含糊吏
恣狼貪之弊索屬僚賀生之饋致卑官私怨而莫
敢聲言受土州拜見之儀啓夷酋玩視而罔知法

紀倉糧則千石取百官攢藉之而多收兵餉則十分扣一戎伍因之而益耗土壻常仲禮擅殺之罪法不可宥也以納賂三百而倖生千長莫已金拐姦之犯告案見存也以輸金五十而脫放他如張李二宦因訐取債負而竝受多金附郭諸民因認住官地而各索紙價事多鄙瑣志切甘肥義寧縣知縣胡 識闇政踈途窮志短紙贖多入私橐登報幾何吏批准典庫銀法紀蕩盡審編每里得銀五十兩承行者戶吏陳朝惟也秤收每兩加耗

一二錢經管者庫吏陳滿清也里排應役既取拜見之金矣而秋糧起徵每名復索銀貳兩民款弓兵旣受叩頭之例矣而按季工食每名復扣銀壹錢伍氏與于政球犯姦淹禁不決因民人杜建勲送銀十六兩方行釋放李乾雇工人溺水私自訪拿因老人石于種過銀二十兩方與領埋其他里書造冊各索常例六房叅缺俱納公堂有難以悉數者以上二臣民怨已叢官箴大壞所宜罷斥者也貴縣知縣今丁憂廖才本疎淺性過慈柔

任書手葉輔爲腹心遇事每憑其撥置信積猾胡
文爲耳目理詞多聽其低昂條編造冊里書受賄
脫漏若罔聞知催徵錢糧保解恣意侵延殊無稽
察人命告詞或沉埋而不理文移申報率雜亂而
無章此一臣者吏才雖短學問未荒相應改教者
也宜山縣知縣何 才本疏通志圖振刷以條
鞭之法爲必不可行而堅持編役之議遂來告訐
之紛然以積逋之奸爲必不可貸而亟申追究之
文反致阻撓之日甚部民至挾憤而鎖縛縣治法

紀何存豪右或倚勢而逼死公差把持無忌讎家
之積忿已深雖窮治以正其辜而難免鑠金之口
本官之求去甚切雖勉留以安其志而日懷鵠毒
之憂此一臣者民怨已多官守未壞若遽令解官
益滋刁俗若仍留供職終速後艱相應移調本省
別縣以示曲全者也伏乞

勅下吏部再加查訪如果臣言不謬將許獄等循資

擢用翟

胡

罷斥間住廖

改教何

改調則甄別旣明而吏治益勸矣

舉劾武職官員疏

題爲舉劾武職官員以重軍政事臣奉

命巡撫廣西陞任交代武職官員例應舉劾訪得分
守永寧叅將署都指揮僉事王瑞韜鈐練習儀貌
魁梧殊勛夙著於嶺南雄畧懋揚於粵右土酋用
命首鋤陽朔之渠兇死士同心盡殄常安之劇寇
二永獍夷望之有同號虎一方士庶倚之不啻長
城此一臣者才畧特優地方甚賴所宜久任以備
本省鎮守之寄者也分守柳慶右叅將署都指揮

僉事倪中化丰標整暇智慮精詳即其外恂恂儒
雅之風叩其中井井戎行之畧陳屯戍之宿弊永
裨兵防擒招賊之渠兇足寒寇膽分守潯梧左叅
將署都指揮僉事王德懋儀容閑雅技藝優長昔
僉書西閩部伍騰安靜之聲今分鎮潯江水陸亨
䟽通之利操持素稱謹恪心地復稟真醇守備永
福都指揮僉事韓文啓年力方壯技射兼長征府
江按捕著勞備永福隄防有畧督新設之營兵餉
無虛冒馭初附之猺獞法善調停城守更嚴保障

可託原推廣東海廉把總保留暫管蒼藤岑三縣
地方以都指揮體統行事署指揮僉事周勲夷情
素練武藝獨優勲勞著于府江恩信孚于徭獍隄
防三邑潛杜七山之奸萌議建陸營控制兩省之
要害久淹下位宜展壯猷桂林右衛指揮使張啓
謨業傳將種熟地利而諳夷情技習戎行暢兵機
而閑官守日思滅賊以貽梓里之安念在策勲以
收桑榆之績初心未負壯志堪酬以上諸臣俱堪
充副叅都備之選內周勲應加職銜仍舊管理蒼

藤等處張啓謨尤宜於本省地方者也又訪得廣西都司掌印署都指揮僉事魏性資近實而韜鈴之畧未聞年力尚堪而統馭之才不足催解衛所文冊則水脚銀兩半入私囊帶管湖廣戍軍則茶果馬草以爲常例方指揮以奉委守哨索受銀瓶錠碗諸物計不下六十金何以責其奉法牛知印因公費傾家告取食鹽房租等銀僅補償二十兩安能免於怨言官舍勘襲既有常規矣而軍解需求之苦特甚馬丁納價既有定例矣而軍餘役

占之數尤多負乘有羞枕戈無志守備興安以都
指揮體統行事署指揮僉事王之野孺穉之年孱
庸之質沉酣率爲常事防禦漫不經心戍軍縱放
生理操演全踈餘丁黃緣脫籍戎行寢耗橫索陸
哨官軍凡宴賓餽客之需無不取給濫遣肆鄉緝
事至傳食誅求之害莫之誰何罰贖則米價折筭
竝收決杖則竹板藤棍交用物議已多地方無賴
以上二臣相應革任回衛以示懲創者也哨守陽
朔地方桂林右衛指揮使林喬梓狼貪之慾虎噬

之威任軍伴蔡三秦永華爲爪牙多方攫取視撫
僮熟徭爲奇貨恣意誅求假張教被殺之事而誣
指莫錢龍用蔡三嚇騙之謀而串同梁晚弟旣鎖
其妻矣而莫扶鑑諸隣皆坐拘累旣賣其女矣而
黃沙牛三隻悉被奪回李進錢以葬母尖山罰銀
八兩拘拏者軍人蔣祖老也李成因其妹自縊罰
銀三兩借貸者田主陳學也每年霜降出哨取馬
脚銀以爲常規廣和一里七兩而思明富和等里
次之每年給換下帖取紙價銀以爲故事村老每

名一錢二分而徭老又倍之不思撫獯安民之責
惟務罔利肥己之圖張敷等之供證已明理刑官
之鞫審甚的此一臣者貪肆已極法紀難容所當
提問重究以爲哨守貪暴之戒者也伏乞

勅下兵部再加查訪如果臣言不謬將王瑞久任備
推倪中化等循資擢用周勲應加職銜照舊管理
蒼藤等處張啓謨以備本省地方推用魏王之
野革職回衛林喬梓行巡按御史提問如律則激
勸有賴而戎務益脩矣

薦舉教職官員疏

題爲薦舉教職官員事臣奉

命巡撫廣西地方陞任交代所屬教職官員例應舉
薦訪得慶遠府宜山縣儒學教諭姚光虞儀觀俊
偉清脩足勵乎士風文學優長儒雅可移乎陋習
青氈翹楚黃甲遺英柳州府融縣儒學教諭李春
顯度若璞藏志存執奮談經講藝卓有陶鎔之功
勵行苦心蔚乎瑚璉之器潯州府貴縣儒學教諭
王汝爲年華青壯學問優涵捐俸以葺學宮志向

不苟却贅以表多士模楷允端桂林府臨桂縣儒
學教諭李任芳律已端慎義利之界甚明績學淵
深表儀之範允稱旣優造士亦裕臨民灌陽縣儒
學教諭鄧肇震年資青壯矩度方嚴閉戶讀書志
行期於遠到傳經課士足跡絕於有司以上諸臣
雖科貢不同器局各異要皆教職之良所當薦揚
者也伏乞

勅下吏部再加查訪如果臣言不謬將姚光虞等酌
量擢用庶人才益勸學政有裨矣

帥臣統轄全省疏

題爲帥臣久著勛勞乞重責任以保固邊圉事臣
奉

命巡撫廣西已逾四載而與總兵官李錫共事者三
年凡征剿府江懷遠洛容陽朔永福諸寇皆本官
身親督戰底於成功而懷遠勞績尤著即今夷獠
畏威水陸絕警本官之功誠不可泯臣非才待罪
成事因人茲當陞任得代敢不據實爲

皇上陳之照得鎮守廣西地方總兵官征蠻將軍右

軍都督府署都督同知李錫雄當八面藝擅一時
威名昔著於淮閩勲伐益隆於嶺海始馬府江督
哨方踰月而諸峒鏟平繼馬懷洛總征未六旬而
萬徭蕩掃理定之舟師扼險寔藉先聲碎江之單
騎前驅卒資成算每戰身先士卒所過無犯秋毫
蓋本於忠誠之心行以節制之略用能破百年未
破之寇成諸將難成之功此一臣者即其靖寇奇
勲誠爲東南之名將要其吞胡壯志尤堪西北之
元戎但夷心方定殫壓正賴威猷善後永圖事權

所宜隆重本官旣膺鎮守重寄則全省地方皆其責任今查原奉

勅諭內開統轄桂林平樂兼制柳州慶遠其潯梧南太思恩等府地方叅備衛所衙門原無備載蓋緣副總兵之舊典與鎮守總兵官事體不同以致各路之夷情兵計多弗預聞本官之行事移文未免牽制萬一地方有事彼此推誤勢所必然非所以重彈壓之權而專責成之意也伏乞

勅下該部再加查議如果臣言不謬將總兵官李錫

假以統轄全省凡左右兩江蒼梧府江叅備衛所等衙門一應夷情兵務一體呈報聽本官會同調度處分其各該有司官如有挾私抗撓悉聽移文提究庶事權隆重調度便宜夷心終服而邊疆賴以永固矣

諮訪將材疏

題爲諮訪將材以備錄用事准兵部咨前事內開看得

國家任用將領所係甚重而朝缺夕補必須得人方

克有濟乃今守備以下缺人推用誠當急爲選求
合候

命下移咨各該總督巡撫及咨都察院轉行各該巡
按御史將所屬上自叅遊守把下至指揮千百戶
等官無拘見任廢革但有年力精壯才略優長堪
以備用者逐加摻訪分別等第逐名開註考語不
得混稱以上各官俱係云云套語致難酌用及將
歷年武舉中式官員一體查訪疏名具奏以憑覆
請附簿備用等因題奉

聖旨是欽此欽遵備咨到臣隨即通行司道等官多方諮訪填報前來該臣覆加叅酌查得南丹衛指揮使干碧騎射閑習才力奮揚備遷來而操縱有方徭夷效順運征餉而委輸不匱士卒歸心居家孝友足稱署衛廉能素著慶遠衛署指揮僉事陳良璧藝能破敵勇可兼人從征三峒諸徭身先士卒哨守千蔓等堡威懾徭夷查荒田以屯兵保障足恃招首賊以歸附江道無虞桂林右衛指揮僉事拱時奮跡武闡素負鷹揚之志策勲行陣屢收

鵬擊之功拊士有恩馭夷得體足當一面閫寄不
孤十載科名象州守禦千戶所正千戶陞柳州衛
指揮僉事孟宗文才貌竝壯謀勇兼資視篆徵屯
部卒頌聲大作征懷村洛諸夷擒斬獨多曾中之
籌算不窮壘外之驍雄莫敵南寧衛左千戶所署
正千戶朱麒氣度有儒者之風才力負武人之畧
擒渠魁不煩兵食征東岸克效勤勞智慮時中機
宜行檢尤知振勵鎮守廣西總兵官標下名色把
總直隸新安衛中所實授百戶李月膽力雄壯弓

馬絕倫昔搗閩南海寇曾收衝陷之功近來懷遠
強徭屢奏馘俘之績束兵尤爲有律遇陣每肯捐
生防守懷遠板江名色把總署試百戶王鸞志勵
勛名藝超倫輩遇強徭於出寇之時以孤軍力挫
其銳守要害於班師之後賈餘勇以抗其衝後先
三載有保全境土之功終始一心無搔擾鄉村之
害以上各官職任雖有不同才力均有足取俱堪
備都司守備之選內王鸞應充把總仍責令防守
地方者也伏乞

勅下兵部再加查訪如果臣言不謬將于碧等備錄
附簿推用王鸞准充把總防守板江地方庶將領
不致乏人而材賢益因以振勵矣

奏請父母卹典疏

奏爲懇乞

天恩俯賜卹典以光泉壤事臣應聘于萬曆三年九
月初九日荷蒙

聖恩推陞戶部右侍郎本年十二月十一日交代離
任臣有母卓氏年八十有二一向就養在任臣思

母年高自聞命以來即擬乞歸終養臣母輒戒臣
曰烏有爲人臣可後公義而徇私情者且我尚無
恙寧偕汝行爾臣重違母命順道趨程不意行至
揚州府地方臣母觸冒風寒至淮安府河下頓覺
沉重于二月二十六日身故臣痛念臣母孀居五
十餘年臣烝烝孤幼賴母鞠育訓誨迄于今日廼
臣罪逢深重禍延臣母負不忠不孝大罪即攀號
殞絕其將何以自贖哉伏覩大明會典內兩京三
品文官并父母母曾授本等封者俱照例祭葬卹典

條例內軍功三品未滿得及其父母及查巡撫貴州右副都御史蔡文伊母病故奏蒙准給祭葬隆慶六年六月內臣任巡撫廣西右副都御史遇蒙皇上登極覃恩臣母卓氏

誥封太淑人萬曆二年十月初五日臣三年考滿任內剿平府江懷洛等處積寇節蒙

聖恩陞賞竊念臣品級軍功似合典例及照卹典例內父母曾授本等封者各許並祭臣父郭湍原任廣西太平府通判病故以臣官累贈通議大夫都

察院右副都御史今將奏母合享而父不霑一祭之榮心切不安及查都御史蔡文亦得並祭伊父蔡德流臣父湍事體相同伏乞

聖慈憫恤微私

勅下該部查照典制議擬

上請如例頒給則臣之父母得以均被寵光臣感激鴻恩與天無極矣奉

聖旨禮部知道該本部尚書馬自強覆奉

聖旨是准照例與祭葬

卷之四終